



明詩正聲卷五十五 七言絕句四

廣陵

盧純學

江一夔

校閱

入園

陳完

西園春色有無間
亭子依然篔簹小山紅藥似憐
親手種半開留待主人還

狼山血戰卷贈朱貳守

將軍稱病卧城樓
郡倅提兵下海陬
兩世受恩期報國
知君原不為封侯



閨怨三首

花落風飄出綉闌似郎游蕩合懽難容華暗裏
隨春老青鏡時時掩淚看

其二

金鳳花開照壁紅風前細搗染春蔥妾身已作
良家婦也學長門佩守宮

其三

亂雪敲窓欲作堆合歡衾冷夢初回芳心恰似
牀頭燭燒折金花草半已灰

江行

姚庶敬

孤槎衝雨入寒汀雨後屏山遠送青今夜月明
何處泊殘鐘聲裏到長亭

獨坐

張謙

獨坐空庭烟雨繁萋萋芳草帶平原憑軒試共
流鶯語為寄幽心入故園

藕花居

陳鳳

十里蓮花過眼新水風猶自起香塵明年還約
看花侶來喚湖邊雪藕人

送陸史之楚

王維禎

楚苑天南暖不遲
隔年梅柳已多姿
春來花絮紛紛起
絕勝梁園雪裏時

粵王山

薛應旂

斷雲衰草粵王城
滿樹寒鴉噪晚晴
寂寞荒臺秋色裏
居人猶說尉佗名

姑蘇驛前別李生懋卿

長干寺裡憶相隨
誰道東來竟別離
後夜思君何處所
錢塘江上月明時

白溝河懷古

陳羽

平沙蔓草血痕斑
十萬征人半未還
千古忠魂招不起
白溝河上望鍾山

濟上送楊質夫兼寄邑人

朱衡

猶記南溪數嶺青
溪頭高敞使君亭
到時父老如相訊
水土初平鬢已星

一鑑亭

全元立

桃源不隔鳳城遙
翠鎖朱闌十二橋
荷葉滿塘香露白
玉人乘月坐吹簫

牧兒

駱文盛

東風吹雨過前溪，草長平原小犢肥。
短笛數聲歸去路，半山明月照蓑衣。

竹枝詞

靳學顏

郎君驄馬江上游，采桑女兒日暮愁。
女兒見桑不見馬，何用黃金絡馬頭。

燕京春暮歌

三月楊花滿御溝，可憐春色亦東流。
行人不用多惆悵，鷓鴣年年喚白頭。

其二

長安古道直如弦，水上垂楊不記年。
遊女玉鈿金絡索，王孫驄馬鍊連錢。

發均州舟中口號自嘲

趙貞吉

杳杳尋山漢水西，王孫遊處草萋萋。
如何浪得南州尉，又想扁舟入會稽。

題王方平上昇處

山如控鶴倚天開，水似游龍蹴地迴。
山水悠悠望靈駕，仙人歸去幾時來。

塞上雜歌

程軌

雲鴻塞上向南飛
遊子天涯愁未歸
轅門夜聽胡笳曲
羌虜秋高馬正肥

其二

俠客彎弓插羽箭
將軍仗劍擁貂裘
傳與三軍休解合
匈奴猶在海西頭

其三

牧馬天驕遼海東
飛煙忽報寇雲中
好將貔虎三千騎
管取麒麟第一功

西湖采蓮曲

尹臺

湖市羅裙映玉缸
蘇堤楊柳拂船窓
采蓮誤觸鴛鴦起
飛向花間還自雙

南中雜言

謝少南

石灘激浪殷成雷
輕舸飄飄曲折開
水樓韃舍橫矛立
山峒徭人負弩回

其二

夜宿沙頭聞犬喧
傍沙密樹即徭村
途懸一線真成畏
軀是千金未敢言

贈吳子充

王問

城柝聲悲月未央
江雲初散水風涼
看君已是無家客
猶自逢人說故鄉

贈茅山道士

曾向華陽洞口過
三峰高處白雲多
仙房隱隱依巖竹
清夜經聲出薜蘿

東李太守磐石

馮惟敏

南去昆明鳥道長
向人處處問同鄉
獨憐萬里尋歸路
此日逢君在岳陽

臯蘭觀兵

馮惟訥

刁斗春寒夜不驚
平沙曉日照連營
但看闌外風雲氣
大將何須問姓名

其二

露骨山前月色高
夜聞胡騎在臨洮
將軍未挂平羌印
獨倚長虹看寶刀

其三

喧喧簫鼓雜鳴笳
競和漁陽第一撾
一望秦川腸欲斷
玉門何日淨胡沙

其四

平沙萬騎正騰驤
捲甲橫行百戰場
莫道將軍能制勝
提兵還有謝中郎

寄河東清溪諸殿下

東柯赤谷尚依然
雲樹蒼蒼渭北天
何事相思不相見
少陵西去又經年

其二

天涯歲晏雪霜繁
又見春風落塞門
一望秦川腸一斷
欲持芳草問王孫

北園春日雜興

朱曰藩

隋堤酒樓高插天
花月春江夜可憐
一自君王罷歌舞
金窓空鎖綠楊煙

雲中樂

塞門楊柳未經霜
錦帕貂裘馬上妝
帶得相思出關去
銀釵嶺上斷人腸

贈沐太華兼憶升菴先生

濯錦江邊霞滿天
博南山下草如烟
相逢偷把刀環視
腸斷孤臣謫九年

雨夜

萬虞愷

孤館殘燈照獨眠
寒江落木正蕭然
西風還送終宵雨
并入江聲到枕邊

送顧九華赴蘭亭之約

吳維嶽

煙水迢迢兩岸春
青帆一片落江濱
可憐剡曲依然勝
君到同遊有幾人

不寐

萬表

山館淒涼客舊京
孤眠中夜覺寒生
故園千里魚鴻絕
腸斷西林風雨聲

贈友

皇甫洵

隱處同鄉溪水濱
鹿門蘿月夢中春
興來呼酒何知客
老去忘機不避人

古意

皇甫洵

奉帚長門二十年
慵施脂粉取人憐
聊開秋扇閒題罷
校是春心薄似前

山翁

汪坦

老翁結屋清溪上
時向南山採蕨薇
松風不動暮雲碧
白鶴下庭歸未歸

張司馬武陵莊

一水盈盈汎小舸山光瑟瑟點宮袍秋來猶記
春來路洞口丹楓似碧桃

夜坐憶防邊將士

林燠

只見天兵出漢家那聞大將靖胡沙莫言行伍
無頗牧祗恐驂騮駕鼓車

其二

中原父老牽衣哭馬上胡兒吹笛回古木斷煙
荒塞道單于容易去還來

其三

村村煙火漸應稀十萬胡兵他自歸破虜將軍
休漫喜莫教再濕萬家衣

送陳甥克廣之鄜城

每憶親朋天一方須憐為客勸離觴無端甥舅
仍分手却把長安作渭陽

寄湖幕張叅軍

早歲談詩鬢已蒼漢庭空自老馮唐關河鴻鴈
清秋迴欲寄相思楚塞長

雨登鎮邊樓次解學士韻

甘茹

居延城外四時秋一曲胡笳月滿樓見說漢家
嚴鎖鑰更誰飲馬海西頭

其二

邊城宿雨喚新秋抱病猶登百尺樓檻外蜀山
應萬點那堪心折大刀頭

塞上值高九叅謀感舊

呂時

射陽湖上藕花秋塞北逢君已白頭碣石嶺邊
黃草夜幾迴飛夢到揚州

其二

洋子橋頭潮水平舊蕪城外復新城豪華自古
傷前事殷浩祠邊秋草生

寄敬叔

他年共憶客他鄉心欲成灰鬢欲蒼記得出門
芳草路小溪春水正斜陽

楊柳詞

東都門外萬條垂細雨含風嫩綠時送盡行人
春不管一條條是斷腸絲

對月東繡嶺主人

古樹荒城昨夜秋
道人多病卧滄洲
可憐一片無情月
江北江南逐水流

別劉生

大江水落三巴月
長夏寒生七澤雲
去住浮踪元不定
鷓鴣聲裡問湘君

送徐使君

劉鳳

隴上旌旗發曉霜
劒寒秋水月蒼蒼
曲中一夜催楊柳
萬里功名屬破羌

送張子

一自風烟落五湖
空將衰草送長途
欲知烈士心猶在
擊破床頭鐵唾壺

送宗子相歸廣陵

李攀龍

廣陵秋色雨中開
繫馬青楓江上臺
落日千帆低不度
驚濤一片雪山來

再別徐子與

馬上垂楊綰別愁
樽前斜日為相留
明朝何處風塵吏
回首青雲是舊遊

塞上曲送王元美

燕山寒影落高秋北折榆關大海流馬上白雲
隨漢使不知何處不堪愁

其二

西出居庸大漠開胡塵遙暗白登臺愁看塞上
蕭條色落日秋風萬里來

其三

白羽如霜出塞寒胡塵不斷接長安城頭一片
西山月多少征人馬上看

酬殿卿長史夏日過飲

蕭蕭風雨北堂寒客似高陽復罷官君但能來
長夜飲不妨人作酒徒看

九日同許殿卿登南山

滿天鴻鴈雨紛紛濁酒黃花把向君莫道隴山
高會後風流今少孟叅軍

和許殿卿冬日招飲田間

白雲湖上北風寒茅屋蕭條兩鶡冠我自能憐
華不注推窓君試雪中看

春日聞吳明卿之京為寄

千載浮雲傷逐臣歸來不改漢宮春
摩挲金馬宮門外誰識當時諫獵人

山中簡許郭二生

金牛谷裏樹蒼蒼一入千峰但夕陽
浪跡莫愁難問訊題詩多在朗公房

寄王元美

薊門城上月婆娑玉笛誰為出塞歌
君自客中聽不得秋風吹落小黃河

哭宗子相

楊子江寒月影孤秋風吹落射陽湖
故人欲灑臨江淚湖上明珠竟有無

輓王中丞

司馬臺前列栢高風雲猶自夾旌旄
屬鏤不是君王意莫作胥山萬里濤

其二

鉄馬蕭蕭落日黃邊聲殺氣滿漁陽
誰知一夜旌竿折搖落中丞栢上霜

其三

昨夜烽烟海上青猶聞麾下取龍庭一時雄劍
無精彩遙指燕山落將星

其四

幕府高臨碣石開薊門丹旄重徘徊沙場入夜
多風雨人見親提鐵騎來

送徐汝恩

天涯明日故人疎莫向尊前嘆謫居最是孤臣
偏雨露君王不問篋中書

寄汝寧徐使君

高齋卧理簿書閒掾史裁詩日往還片月不離
桐栢水白雲偏傍弋陽山

寄吳明卿

秋色蕭條傍謫居體中今日定何如從他幾載
風塵吏不作平津相府書

其二

楚娃雙侍玉為顏勸酒能歌雉子斑醉殺休論
官不調古來遷客幾人還

許使君見過林亭

濁酒自沽還自把先生寄傲南窓下門前五柳
漸看長使君時時來繫馬

從軍行

王世貞

夜深鄰帳送胡笳三月春寒雪作花吹盡關山
楊柳曲壯心元自不思家

其二

蹀馬吹塵紫極昏洗刀飛血九河渾長城直拓
三千里表取陰山作北門

晚春

漠漠殘花獨閉門斜陽偏惹淚珠痕閨人只怨
秋宵永春日何曾不斷魂

贈別吳子充

布帆猶帶楚雲寒樽酒相逢桂未殘明發又為
千里別故鄉今日是桑乾

荅寄延綏王中丞

十載南冠草莽臣至今猶愧脫驂人那堪一掬
酬恩淚半入漁陽半入秦

戚將軍贈寶刀歌

鑄成胡冶笑相看
朶朶蓮花映日寒
自是君家第三劍
當年不遣贈來丹

九江道中大風

烏頭千樹捲秋蓬
亂激飛濤拍大空
坐起船窓渾不覺
此生元慣石尤風

江州問琵琶亭

亦知遷地勝長沙
無那中年易憶家
裁唱楚歌頭便白
不須遙夜聽琵琶

哭王君載

休論騎馬與衣朱
一領襤衫未破除
欲向文君採舊草
可憐強半制科書

即事題小景

過雨山城綠欲齊
一羣嬌鳥踏枝低
不知謝豹今何處
應在春明門外啼

送李于鱗還郡

石門高峽沙丘臺
五馬春停天地開
無限北風吹不到
萬家明月待君來

別于鱗諸君二首

金河楊柳未堪齊
馬首傳觴白日低
俠客自來輕別甚
醉乘飛雨薊門西

寄謝茂秦

亦知留趙魯先生
片語能尊萬乘名
何事平原無上客
却教雙壁贈虞卿

寄李伯承

漢帝秋風在栢梁
一時詞賦有輝光
那知此日文園令
猶有金莖露未嘗

寄荅徐子與

白雪誰傳和郢篇
中原風色尚蒼然
故人儻問行藏事
自種要離墓畔田

送宗子相還廣陵

徐中行

霜落江空楓葉彫
接天寒色廣陵潮
清宵憶爾聽鴻處
明月揚州第幾橋

燕臺感舊

北來鴻鴈已南飛
滿眼風塵舊侶非
欲向月明歌郢曲
不禁霜露濕人衣

言
卷之五
十一
停舟溪上懷子相

夜闌星斗挂千峯吹笛江樓思萬重曲罷美人
猶不見空懸明月照芙蓉

送于鱗還郡

風塵幾日到燕關千里襜帷雨雪還把酒郡齋
秋色滿知君不厭太行山

感舊

自別燕臺白日徂華陽碣石總荒蕪獨留一片
西山月猶照當年舊酒壚

征南鏡歌

橫海樓船大出師青山千里列旌旗會稽擬作
燕然石震澤今為飲馬池

李于鱗謝病濟南寄訊

白雲湖上萬山青日日茅堂醉復醒不是楊雄
甘寂寞千秋誰見太玄經

送張助甫尚璽左遷別駕

洛陽誰似賈生賢議事承明獨少年最幸主恩
深漢帝左遷猶在五雲邊

曲溪

曲曲清流隱竹林
逶迤更比五雲深
春來岸岸花相似
縱有魚郎何處尋

哭醉石山人朱邦憲

文似相如竟不收
素封聊作醉鄉侯
如何天上知名姓
一夕徵君記玉樓

其二

誓將七尺報相知
一諾南山坐不移
不信但看墳上草
青青長自傍要離

送宗子相

妙高峰上試登臨
月色潮聲盡古今
詞客豈須愁病肺
中冷泉水更清心

送李于鱗之邢州

東平俠客有劉生
寶劍千金舊署名
忽道明朝脫相贈
夜深風雨匣中鳴

其三

十年西省尚書郎
此日新携刺史章
明月一尊開北海
春風千騎下東方

送許趙州兼訊李邢州

青春五馬下燕京
自喜分符近李生
雙壁千秋重入趙
共看明月照連城

送王元美

高秋獨上白登臺
西北浮雲晝不開
忽見千山飛雪下
驚傳漢使自天來

其二

醉携長劍倚高秋
忽見黃河天外流
莫更臨風歌出塞
九邊寒色不禁愁

明詩正聲卷五十六 七言絕句五

盧純學 編輯

廣陵

江一夔 校閱

送宗子相移疾歸廣陵 吳國倫

淮南落日半江明
江上寒潮萬里生
遙夜懷人意何限
一帆秋雨傷蕪城

春江詞

樓頭小婦拭春衣
昨日看花今日稀
暮雨偏深碧草色
東風不送王孫歸

雲龍山

雲龍山閣俯彭城
醉裏聞歌激楚聲
霸業已隨陵谷易
黃河不盡古今情

項羽祠

失道陰陵氣已摧
漢兵一合楚雲哀
虞姬亦是銜恩死
不為君王結草來

舟發芋原至水口

桃花落盡海門春
烟水茫茫又問津
一夜棹歌聲不斷
萬山愁殺未歸人

周文美山人見訪閩中

兵戈初息汝能來
海上層雲壯越臺
欲共登臨一舒嘯
萬山秋色使人哀

秋日懷徐子與

扁舟自去浮湘水
倦客常懷卧茂陵
秋湛漢宮金掌露
月明滄海玉壺冰

九日同李于鱗賦

秋深木落鴈南飛
客裡風霜欲授衣
燕市酒酣聊共賦
龍山家在未能歸

寄懷李于鱗

聞道齊中老伏生遠携妻子歷山耕漢家若有
傳書詔使者何從問姓名

再寄于鱗

日日東山望裏春那驅羸馬向風塵誰將馬上
春雲色一寄山中抱膝人

香爐峰

山烟細細五雲盤散入春陰楚甸寒我欲峯頭
瞻北極香爐不似殿中看

石鏡

萬仞峯頭石鏡懸平臨日月倒垂天滄江夜色
寒相照下有驪龍不敢眠

寄王元美

魏裳

朱絃一絕少知音白雪難酬國士心腰下青萍
君所贈至今風雨作龍吟

北山訪梁思伯諸子不遇

梁有譽

竹塢無塵日已曛數聲啼鳥隔花聞平蕪一望
涼風起吹落江城萬樹雲

其二

此日相期汗漫遊，獨尋猿鶴北山頭。
池塘花落無人管，空鎖蟬聲一院秋。

華陽明月曲同子與賦

宗臣

月滿空山青不流，仙人來贈紫雲裘。
一尊高卧藤蘿上，醉殺華陽萬里秋。

塞上歌送王少司馬赴薊鎮

司馬頻年西破戎，詔書又下九華宮。
親提萬騎如風雨，一夜來屯紫塞東。

過采石懷李太白

憶君乘月下金陵，何處吳山不夜登。
一曲瀟湘秋萬里，至今疑在白雲層。

其二

楚水秋風颯葉高，片帆明月大江濤。
娥眉亭下芙蓉色，猶似當年宮錦袍。

其三

夜夜銀河倒不流，長虹西挂彩雲愁。
醉來江底抱明月，驚落天門萬頃秋。

其四

采石磯頭坐白雲青楓滿地落紛紛夜來吹笛
江亭上明月窺人恐是君

其五

青山千仞落寒潭采石江邊一駐驂君跨長鯨
去不返獨留明月照江南

塞上曲

謝榛

暮雲黯淡壓邊樓雪滿黃河凍不流野燒連山
胡馬絕何人月下唱涼州

寄塞上少司馬蘇公

白登城下早霜淒黑水河邊暮雁低還憶去秋
明月下胡笳吹過七陵西

其二

鴉啼初日塞門開昨夜陰山探騎回秋盡漠南
冰雪遠單于不敢射雕來

送徐進士謫建陽少尹

長亭別酒見平生越水吳山去國情欲采江蘼
何處泊一帆秋雨聽潮聲

衡水

城外河流白練長
城中萬戶正秋光
秋來偏作還家夢
河水東流到故鄉

遊金燈寺

策杖穿林路幾重
禪家清磬隔雲峯
再來只恐無尋處
好記懸厓一古松

郭壽卿園亭

郭家亭子夾松篁
把酒臨池幽興長
人在千山秋色裏
不知雲氣滿衣裳

送王夢白歸江東

吳帆歸去逐江雲
白鶴橋西舊隱君
門掩梧桐賦搖落
秋風不是客邊聞

本公山房

滿山秋色亂寒松
天外遙傳日暮鐘
爭怪簷前起雲霧
誰知鉢底卧蛟龍

擣衣曲

秦關昨夜一書歸
百戰猶隨劉武威
見說平安收涕淚
梧桐樹下搗寒衣

尋葛徵君

城西閒訪葛洪家籬落秋餘白菊花高卧自知
無俗夢數椽茅屋在烟霞

水仙花

月為精魄水為神素質先含雪裏春羅襪凌波
斷行跡誰能喚起弄珠人

送胡二侍御按江右

陳栢

畫舫初開漢水東錦帆高掛颺長風懸知此去
經彭蠡湖上魚龍亦避驄

送徐元禎閱兵塞下

西山雨後露青螺送爾遙從碣石過會見胡塵
先已淨洗兵寧用挽天河

送程孟孺

莫道襄陽似昔時習家池上草離離兒童解唱
銅鞮曲誰共山翁倒接羅

朝陵歌二首

張才

本朝陵墓傍燕關殿閣參差霄漢間王氣千年
朝北極雄圖萬里抱西山

其二

松門回首七陵遙
春殿金燈鎖寂寥
地迥忽看星斗動
夜深疑有鬼神朝

海棠

沈明臣

一曲春風醉後歌
白頭其柰海棠何
半生自數看花伴
惟有秦淮市上多

春怨

獨抱琵琶西向秦
誰憐妾是斷腸人
東風吹綠新楊柳
嫁得蕭郎已過春

新買釣舟

春水桃花去路長
釣舟新買白雲鄉
一竿正欲投南浦
領得西山半夕陽

過趙姬墓

樹底誰來葬綺羅
好花開少葉飛多
無情日月空纏死
一段春魂托女蘿

其二

細雨如塵濕不開
香魂空逐水聲迴
最憐白日東風死
春色何年轉夜臺

竹枝詞

青黃梅氣煖涼天紅白花開正種田燕子巢邊
泥帶水鶉鴣聲裡雨如煙

其二

門前竹大筍成筍江上潮來草沒沙村童採鷺
綠楊樹野艇撈魚紫楝花

臘月十日送馬用昭還閩

錢唐霜月建溪烟獨上孤舟去渺然歷盡關山
家未到不知何處過殘年

睡起

呼相儒

翠流松日石林陰啼鳥驚人過別林夢裡呼童
掃紅雪覺來簷際落花深

都城元夜歌

劉效祖

踏歌聲調入雲高中使承恩賜錦袍見說太
平今有象春風醉殺五陵豪

折楊柳

楊柳千條拂地垂春風送客妾心悲誰家年少
輕離別偏把愁聲笛裡吹

塞上曲

龍沙近接古檀州多少從軍倚戍樓
寒夜不堪愁絕處西山片月挂城頭

其二

朔風吹雪度沙場傳道單于獵白狼
北望征塵何處是暮雲無際草蒼茫

山門

孫永思

山門日落望江干雲樹微茫晚色寒
欲向東風歌一曲鷓鴣聲裏荳花殘

江上送客

李奎

月白霜寒歸路遙哀鴻落葉共蕭蕭
孤舟今夜泊何處卧聽空江落暮潮

嚴陵

潮落江空水滿汀芙蓉兩岸暮山青
月來渡口灘聲急自采蘋花薦客星

與劉山人飲酒家

洞庭春色釀蒲萄亂後逢君脫寶刀
且向壚頭沽一醉木蘭花下聽吹簫

送人之戍

周詩

寂寞河梁飛夜霜
西風正馬最堪傷
滄洲明月思君處
腸斷關雲萬里長

過無錫李相讀書臺

書臺烟鎖青山色
石澗雲封碧水流
弔古豈勝春日裏
一林啼鳥向人愁

送人之北

魏學禮

蘼蕪渺渺浪花香
雲水蒼蒼道路長
且聽琵琶更終曲
孤舟明月是他鄉

呈劉兵憲

許邦才

建節西南漢大夫
飛揚萬里見雄圖
即因叩竹收諸郡
更遣葡萄達上都

留別劉公

秋風長缺幸生還
明日孤臣入楚關
莫道三年人萬里
天涯消得幾重山

汴河守凍

客館寒燈淚滿襟
間關萬里欲歸心
眼前一水冰霜苦
又說三江瘴癘深

寄懷王元美

鴻鴈驚秋海上還，片雲孤月薊門關。
柰何昨夜西窗夢，不道千山與萬山。

送別郭子坤赴選

十年高枕戀柴關，此夕青樽照別顏。
不是乞為勾漏令，那能更出句容山。

其二

老去風雲意氣孤，因君更與話江湖。
定經燕市悲歌地，為問當年舊酒徒。

九日李于鱗招飲南山

歲序驚心水急流，年來又白幾人頭。
那知綠酒青山外，惟有黃花似故秋。

得于鱗書却寄

青春載酒上平臺，忽報文園寄賦來。
賓客一時俱授簡，人間難得是仙才。

丁香花

蘇小西陵踏月回，香車白馬引郎來。
當年剩縮同心結，此日春風為翦開。

秋盡

胡安

籬畔黃花照紵衣寒城紅葉待風飛
月明長繞河橋路正好歸時客未歸

雨後

彭年

洞底泉聲谷口聞望中峰色杳難分
欲尋雨後金芝草更躡前山半濕雲

送張伯純還閩中

陳鶴

憐君獨棹渡黃河西北山川入雍多
料得到家春未至馬蹄半在雪中過

登金山

瓜州霜落鴈初飛鐵甕城寒樹漸稀
南國興亡空悵望金山殘月夜潮歸

訪張白崖不遇

經年不卧洞中霞門外山桃又放花
明月半簷松露滴道人今夜宿誰家

送張舍人還永嘉

幾年相憶在京畿一過吳門便拂衣
君似舟前夜潮水纔臨江口又西歸

吹笛懷友

玉笛橫吹入夜分
中天華月度流雲
茗川兩岸春風起
飛盡梅花不見君

早春懷王元美

李先芳

新正簫鼓日紛紛
雪霽遙看玉筍雲
借問江城春幾許
梅花落盡不逢君

宮詞

玳瑁琵琶綴玉環
為囊盛裏繡雙鸞
自從學得朝元曲
不對君王不敢彈

燕京歌

金鱗玉骨水晶盤
冰簟銀床芍藥欄
堦下笙歌如鼎沸
滿堂紅袖不勝寒

怨歌行

胡姬十五夜當壚
美酒春生白玉壺
啼盡寒鴉人不到
高樓空墜月明孤

隆福寺訪許伯玉

車馬闐闐日復西
長安城裏問招提
無緣共卧東林榻
空帶鐘聲出虎溪

再過玉堤

馬蹄日日逐紅塵
白髮青山應笑人
昨日玉河堤上過
杏花開盡不知春

送王生遊秦中

燕山朔雪暗胡沙
又逐秦雲聽暮笳
不念廣陵橋上月
玉人腸斷落梅花

對酒再贈抑所

四月垂楊拂御堤
上林深處轉黃鸝
長安道上花無數
不許行人看少時

江行野望

逐客偏驚漢國秋
白雲飛盡見京樓
天門倘許乘槎入
一夜銀河水倒流

贈嚴州楊生靜先

楊金

嚴陵一別十年餘
訪舊何緣到草廬
前路若逢知己問
楊雄今已鬢毛疎

宮人月下吹笛

江汜

獨坐秋階弄月明
橫吹玉笛彩雲停
長門夜半梅花落
訴與君王夢裡聽

靈峯洞

張佳胤

鐵壁千尋劈巨靈
天門中斷列仙庭
消搖自隔人間世
朝暮雲封不用扃

題徐生夢雲卷

夜半天鷄啼紫烟
瓊裾長與白雲眠
高松萬壑搖明月
無數寒濤落枕邊

登太行山

雨後天雞倚杖聞
長松日日挂飛雲
峰頭收得芙蓉露
煮石招呼太華君

江津舟中即事寄懷楊太史

岷江東下古今流
客子西來風雨愁
一片錦帆天際落
不知何處是渝州

其二

白霧濛濛山色寒
誰家漁網繫江干
歸心倏忽三千里
烟水愁添十二灘

其三

碧草烟花照客舩
山青沙白浪浮天
美人遙隔千峰雨
何處看雲不可憐

送劉使君之襄陽

太嶽天門紫氣垂
松花片片曉風吹
孤懷化作千峰月
夜夜隨君君不知

送亢水陽左使西川

使君中夜傷三台
建節今從益部來
閣道排天雙劍出
棧雲驅馬萬靈開

出塞曲

羅廷唯

插箭嶺頭飛白雪
廣昌城外起黃沙
寒衣未盡戎衣薄
遮莫征人正憶家

搗衣

俞允文

月樹朦朧夜色微
清砧不斷曉鴉啼
才年少婦閨中力
不寄遼陽萬里衣

延州雜興

王世懋

涼風獨對意倏然
驟雨淋漓洗碧天
今夜吐延川上月
夜深還照吐延川

自宜君至同官道中

片片陰雲暗欲摧
市車長日困崔嵬
山田極目無人種
一讓山花爛熳開

酬屠長卿明府

正得齋時禮太清
天風忽墮步虛聲
雲璈露澁
星冠冷七葉芙蓉
片片明

其二

藥珠光映散花筵
風骨泠泠字欲仙
好是朝來
餐秀句教人容易薄
腥膻

其三

藕葉尊絲江上香
那能騎馬住檀鄉
還家傷得
神仙令莫放雙鳧去
洛陽

徐州口號

嚴程無奈客愁何
昨夜秋聲枕簟多
十日鄉關
渺何許一肩風雨渡
黃河

夜宿固山舖大風寒作

孤館無人月色荒
旋披行李自支牀
怪來衾底
寒如束一夜東風露
作霜

清流關

清流古關矗雲表
出峽長風折秋草
十年五上
車耳生紅顏暗擲
關山道

讀覺菴程廣文九歌哀而輓之
舊恨新悲死更長猶看碧血染琳琅生時一片
虞翻骨博得脩文地下郎

秋宮怨

一派笙歌出苑牆隔簾猶自暗聞香秋來殿殿
添宮漏只有昭陽不夜長

再宿豐安寺

兩年重入豐安寺磬折依然舊使君只有頭顱
非故色更隨風雪共紛紛

其二

投劾經年去未能橐鞬今日思山僧坐來心性
元無着風雨聲中一盞燈

送曾以三巡撫川中

陳文燭

萬卷圖書一葉輕芙蓉秋映錦官城三秦多少
門牆客此去仍兼化蜀名

贈孫兆孺

作賦中原幾大夫可堪淪落半江湖風波是處
瞿塘峽別後相思夢亦孤

送郭龍岡歸閩

顧瑄

路出城西日半斜
春風楊柳各天涯
閩山楚水三千里
愁絕尊前二月花

憶昔

江一魚

憶昔當年躍馬時
春風花底醉淋漓
于今歌舞皆塵土
猶記慇懃贈別詩

寄遠曲

睡起臨粧思轉多
怨雲愁雨上雙蛾
翠綃封就無從寄
空憶南樓片鴈過

過臨洮見長城故址

陰磧茫茫朔氣昏
幾家寥亂不成村
民風大半皆秦俗
猶有長城舊恨存

月夜聞笛

秋風萬里動高城
何處淒清玉笛聲
一曲關山吹未盡
不堪孤月向人明



言部正書
卷之三

